

SURANA YAHYA TALU MPEARONA

POGAU BHAA-BHAANA

Surana Yahya Talu Mpearona sii aburia samia "kapalana jama'a" to samia motokailiilina i tanga-tangana jama'a mokosaroakana Gayus. Moburina sura incia sii apuji Gayus roonamo kahambana to manga miana Karasiteni mosagaanana. Incia uka audhaniaka Gayus pokaiana tee samia umane mokosaroakana Diotrefes.

Antona

Porikanaana pogau 1-4

Gayus atopuji 5-8

Diotrefes atopasala 9-10

Demetrius atopuji 11-12

Kapadhaa 13-15

Salamu

1-4

¹ To Gayus witinai imaasiakaku, minaaka i Iaku, samia mancuana jama'a mompuu-mpuuna momaasiakako i nuncana kabanara.

² E witinai imaasiakaku, iaku kudo'aakako mamudhaakana i nuncana sagala giu o kadhaangiamu amalape, tee mamudhaakana inda umapii apokana mboomo jiwamu uka amalape.

³ Iaku kukaunde-unde mpuu wakutuuna pia pia mia witinaita aumba tee adhawu kasakusii pokaina tee uose dhala mobanara, tee tuaapa udhadhi i nuncana kabanara.

⁴ I karoku inda dhaangia o kaunde-unde molabhina kaogena minaaka i kaunde-undeku wakutuuna kurango manga anaku adhadhi aose dhala mobanara.

Potulutulungi tee Poewangia

5-12

⁵ E witinai imaasiakaku, pewaumu amembali atoparacaea minaaka i giu opeapo uka ipewaumu to manga witinaimu sa'iimani, moomini manga incia o mia inda imataumu.

⁶ Manga incia uka padhamo adhawu kasakusiina i aroana jama'a pokaina tee kaasimu. Ande amembali manga incia utulungia sampearopo uka mamudhaakana manga incia amembali apalausaka lingkaana, tee mboo sumai ingkoo upasanaamo incana Aulata'ala.

⁷ Roonamo lingkaana manga incia rampaakanamo saroni Kawasana Opu, manga incia inda atarima kahamba opeapo uka minaaka i manga mia inda momatauna Aulata'ala.

⁸ Rampaakanamo sumai, ingkita tawaajibu tatulungi manga incia, mamudhaakana ingkita takarajaa tapobhawa-bhawa tee manga incia to tapakawaaka kaadhari mobanara minaaka i Aulata'ala.

⁹ Iaku padhamo kuburi sura pia mpearo to jama'a, maka o Diotrefes mopeeluna to amembali kapala i nuncana jama'a, amendeu manga'akui.

¹⁰ Rampaakanamo sumai, ande kuumba naile itu, bhekuudhaniakea bhari-bharia giu mopadhana ipewauna, tuaapa incia afitanaaku tee

ahinaaku tee pogau madhaki. Inda soo incia sumai, incia uka amendeu atarima manga witinai sa'iimani moumbana iwe siitu, tee uka alarangi manga mia bhemotulungina witinaita tee apalimbaia minaaka i nuncana jama'a.

¹¹ E witinai imaasiakaku, bholimo uose pewau madhaki, maka uosemo pewau momalape. Mia mopewauna kalape o asalana minaaka i Aulata'ala, sainamo mia mopewauna kadhaki indapo amatau Aulata'ala.

¹² Pokaiana tee Demetrius, kasakusiina bhari-bharia mia amalape. Tee akobukutiimo ande o dhadhina apokana tee kaadhari mobanara. Ingkami uka tasakusiiakea ande incia o mia malape, tee ingkoo umataua ande o kasakusi-imami sii abanara.

Kapadhaa

13-15

¹³ Abhari mpuu manga giu bheiburiku to ingkoo, maka kumendeu kupakawaakea alaloi sura.

¹⁴ Iaku kuharapu indamo amangenge kupokawa lausaka tee ingkoo, mamudhaakana tapogau tapoaro rou.

¹⁵ Maasangia umasanaamo. Manga sabhangkamu iwe sii alamboko salamuna to ingkoo. Tee pakawaakea salamuku to bhari-bharia manga sabhangkata samia-samia.

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

7df9af1f-1c49-59d2-a164-bde0a20127b3